

**কবর**

(নাটক)

মুনীর চৌধুরী

## কবর

(মঞ্চে কোনোরূপ উজ্জ্বল আলো ব্যবহৃত হইবে না। হারিকেন, প্রদীপ ও দিয়াশলাইয়ের কারসাজিতে নাটকের প্রয়োজনীয় ভয়াবহ, রহস্যময়, অশরীরী পরিবেশকে সৃষ্টি করিতে হইবে।

দৃশ্য : গোরস্থান। সময় : শেষ রাত্রি।

তিন চার ফুট উঁচু একটি পুরু কাল কাপড়ের মজবুত পর্দার দ্বারা মঞ্চে দুই অংশে বিভক্ত, লম্বালম্বিভাবে নয়, পাশাপাশি। সামনের অংশে কী ঘটতেছে সবই দেখা যাইবে; কিন্তু বিভক্ত মঞ্চার পশ্চাৎ অংশে কেহ দাঁড়াইলে দর্শকের চোখে পড়িবে না।

পর্দা উঠিলে দেখা যাইবে খালি মঞ্চার ডান কোণে একটি লর্শন টিম টিম করিয়া জ্বলিতেছে। সামনে একটি মোটা পোর্ট-ফোলিও ব্যাগ, মুখ খোলা। পাশে একটি ছোট গ্লাস, খালি। একটি বুমাল মাটিতে পাতা রহিয়াছে। মনে হয়, এইমাত্র তাহার উপর কেহ বসিয়াছিল। সেই লোকটিই মঞ্চার ভিতরে আবার ঢুকিল। হুফপুফ বড়-সড় শরীর। চালচলন গণ্যমান্য নেতার মতো। ভারি কী উপযুক্ত সাজগোজ। ভিতরে ঢুকিয়াই আবার ডাকিল -)

নেতা : গার্ড ! গার্ড !

(নীল কোর্টা পাজামা পরা গার্ডের প্রবেশ। পায়ে খয়েরি ক্যান্ডিসের জুতা। পাজামার প্রান্তদেশে মোজার মধ্যে গৌজা। হাবভাবে প্রভুভক্তির ঝলক, কিন্তু আপাতত একটু হতবুদ্ধি ও ভয়াত ভাব। হাতে নিভন্ত লর্শন। ছুটিয়া প্রবেশ।)

গার্ড : জী হুজুর। (দ্রুত নিঃশ্বাস)

নেতা : কী রকম গার্ড দিচ্ছ ? তোমাদের পাহারা দেবার এই নাকি নমুনা ? ছিলে কোথায় এতক্ষণ ?

কতক্ষণ ধরে ডাকছি কোনো সাড়া নেই।

গার্ড : পরথম পরথম ঠাণ্ড করতে পারি নাই হুজুর। এমন ঠাণ্ডা আর আশ্বাস হুজুর যে, কানের মধ্যে খামুখাই কেবল ঝাঁ ঝাঁ করে।

নেতা : তোমার পোস্টিং কোথায় ছিল ?

গার্ড : ঐ পশ্চিম কোণে। ঐ কিনারের শেষ লাল বাসানো কবরের পাড়।

নেতা : ওখান থেকে এখানে আসতেই একেবারে হাঁপিয়ে পড়েছ ? বাহাদুর গার্ড দেখছি। বাতি নিভিয়ে রেখেছ কেন ?

গার্ড : (চমকাইয়া হাতের লর্শন দেখে) ওহ! এ্যা, পইড়া গ্যাছলাম। তাড়াতাড়ি কইরা আইতে গিয়ে পইড়া গ্যাছলাম গর্তের মধ্যে।

নেতা : গর্তে ?

গার্ড : কবর। পুরান কবর হইব। একদম ঠাসা আছিল। না বুইঝা পা দিতেই একদম ভস্ কইরা ভিতরে ঢুকি গেছি।

নেতা : Idiot ! চোখ মেলে পথ চলো না ? খেলার মাঠ পেয়েছ নাকি ? এটা গোরস্থান। সাবধানে পা ফেলতে

পার না ? যাও । ডিউটিতে যাও ।

(অন্যদিক হইতে নিঃশব্দে প্যান্ট-কোট-মাফলার চাদর জড়ানো কিছুতকিমাকার এক ব্যক্তির প্রবেশ ।  
নেতা তাকে লক্ষ করে নাই ।)

গার্ড : জী হুজুর । (স্যালুট)

নেতা : যাওয়ার পথে আবার আরেকটার মধ্যে পোড়ো না । কাতার দেখে আল দিয়ে চলবে । যাও । কোনো কাজ  
নেই । এমনি ডেকেছিলাম । বাতিটা জ্বালিয়ে দিয়ো ।

গার্ড : জী-হুজুর । (স্যালুট ও প্রস্থান ।)

ব্যক্তি : (নেতার পেছন হইতে) তখনই বলেছিলাম স্যার এসব আজোবাজে লোক ?

নেতা : (চমকাইয়া) কে ? তুমি কে ?

ব্যক্তি : আমি স্যার, ইন্সপেক্টর হাফিজ ।

নেতা : ওহ ! আপনি ! এমন করে নাকে-মুখে কাপড় জড়িয়েছেন যে, অশ্বকারে চমকে ওঠেছিলাম । ভবিষ্যতে  
ওরকম আর করবেন না । না, ভয় পাইনি । গত চার-পাঁচ বছরের মধ্যে ভয় কখনই মনে ঢুকতে পারে  
নি । তবু ডাক্তার বলেছে আমার নাকি হার্ট উইক । সাবধানে থাকতে বলেছে । কী বলছিলেন বলুন-  
(বসিয়া গ্লাসটা হাতে লইবে এবং অন্যমনস্কভাবে পোর্ট-ফোলিও ব্যাগটার মুখ খুলিবে ।) ইন্সপেক্টর  
হাফিজ খুব স্বাভাবিকভাবে কথা বলিতে চেষ্টা করিবে । কিন্তু নজর পুরাপুরি নেতার হাতের দিকে ।)

হাফিজ : এই বলছিলাম, এ সব হাবা-গোবা লোক সঙ্গে না আনলেই পারতেন । কাজ বানাবার চেয়ে পড়  
করাতেই বেটারা বেশি পটু ।

নেতা : তা হোক । ওরা আমার বিশ্বাসী লোক । আপনার সারা অফিস ঢুড়লেও অমন লোক জুটত না ।

হাফিজ : এটা স্যার ঠিকই বলেছেন । সব একেবারে হারামির বাচ্চা । বেতনটাকে পাওনা দাবি হিসেবে আদায়  
করতে চায়, নিমক বলে মানে না । এজন্যই তো আজকাল কোনো অফিসেই ফেইথ-ডিসিপ্লিন এগুলো  
খুঁজে পাবেন না স্যার ।

নেতা : হুম্ (ব্যাগটা আবার দেখেন । চারিদিকে কী যেন খুঁজিতেছেন ।)

হাফিজ : তবু কিছু কাজ আছে স্যার, যা বিবির সামনেও বেপর্দা করতে নেই । তা ছাড়া শহরে কারফিউ লাগানো  
থাকতে এখানে গার্ডের কোনো দরকার ছিল না । কটাই বা লাশ আর । গোর-খুঁড়েগুলোকে নিয়ে আমি  
একলাই সব সাফসুফ করে রাখতাম । তার ওপর শীতের মধ্যে আপনি কষ্ট করে .....

নেতা : কিছু কাজ আছে যা অন্যের উপর চাপিয়ে দিয়ে নিশ্চিন্ত হওয়া যায় না, তা সে যতই পটু হোক না  
কেন । (দাঁড়াইয়া খুঁজিতে থাকে ।)

হাফিজ : কিছু খুঁজছেন স্যার ?

নেতা : হ্যাঁ । একটা বোতল, এ গ্লাসটার পাশেই ছিল । ভূত-জিনে আমি বিশ্বাস করি না । বিশ্বাস করলেও,  
তারা কেউ এসে একেবারে বোতল সমেত আমার হুইস্কি শেষ করে যাবে-মনে হয় না । একটু  
আশেপাশে খুঁজে দেখুন তো, আমিই ভুলে কোথাও ফেলে গেছি নাকি ।

হাফিজ : ব্যাগের ভেতর পুরে রাখেননি তো ?

- নেতা :** না। ওগুলো ভরা বোতল। এটা কিছু খালি হয়েছিল।
- হাফিজ :** ওহ্ ! তাইতো ! এ-তো বড় সাংঘাতিক কথা ! না না। ভালো করে খুঁজে দেখা দরকার। বোতলটা কী রকম স্যার ?
- নেতা :** না খেয়ে থাকলে বোঝানো যাবে না।
- হাফিজ :** না স্যার, মানে স্যার আমি, বোতলটার শেপ-গড়নের কথা বলছিলাম।
- নেতা :** ওহ্ খুঁজে দেখুন। আমি নতুন একটা খুলছি, আপনি ওটার খোঁজ করুন।
- হাফিজ :** (দর্শকদের দিকে পিছন দিয়া, মেঝের অন্য কোণে উপুড় হইয়া কী খোঁজে। তারপর মাটিতে একবার হাত ঠেকাইয়াই চিৎকার করিয়া উঠে।) পেয়েছি ! পেয়েছি ! স্যার ! এই যে ! এইটে না স্যার ? (একটি খালি মদের বোতল তুলিয়া দেখায়।)
- নেতা :** অত জোরে হঠাৎ চোঁচিয়ে উঠবেন না। গত চার-পাঁচ বছরের মধ্যে কোনো দিন ভয় পাইনি, এটা ঠিক। তাহলেও এটা গোরস্থান। খেলার মাঠ নয়। হঠাৎ চোঁচালে বুকে লাগে। আপনাকেও বলেছি একবার। দেখি। হ্যাঁ। বোতল এটাই।
- হাফিজ :** কিন্তু, মানে, একদম খালি যে স্যার !
- নেতা :** তাতে ক্ষতি নেই। যে খেয়েছে সে যে বোতলসুন্দর সাবাড় করতে সক্ষম নয়, বর্তমানে সেটাই আমাদের জন্য এরকম জায়গায় সুখের কথা। অন্তত ভয়ের কথা নয়।
- হাফিজ :** ভয় ? কী যে বলেন স্যার। মানে আমি ভেবেছিলাম হয়ত এমনিতেই কারো পায়ের ধাক্কা লেগে ছিটকে পড়ে গিয়ে থাকবে। সব হয়ত মাটিতে গড়িয়ে পড়ে বরবাদ হয়ে গেছে। নিশ্চয়ই ঐ গার্ড ব্যাটার কাড। কবরের গর্ত থেকে উঠে এসে সোজা আপনার বোতলের ওপরই হয়ত আবার হোঁচট খেয়েছে। অমন দামি জিনিসটা নষ্ট করে দিল স্যার !
- নেতা :** আপনাকে প্রথম ভেবেছিলাম নেহায়েৎ সরকারি কর্মচারী। এত দরদি লোক বুঝিনি।
- হাফিজ :** সব মাটিতেই পড়েছে স্যার। হাত দিয়ে দেখলাম। জায়গাটা ভিজে একেবারে কাদা কাদা হয়ে গেছে।
- নেতা :** আপনার এ চাকরি নেওয়া সার্থক হয়েছে। এবার একটু বসে আরাম করুন। ভয়ংকর ঠান্ডা। আপনার পা সুন্দর কাঁপছে।
- হাফিজ :** অ্যা ! পা ? টলছে-মানে, কাঁপছে ? ওহ্ ! হ্যাঁ, তাইতো, ইস্ কী বেজায় শীত। একটু বসি তাহলে স্যার, এ্যা ? (নেতা তখন হোৎকা পোর্টফোলিও ব্যাগ হইতে নতুন বোতল খুলিয়া ক্রমাগত ঢালিতেছেন।)
- নেতা :** ওদিককার কাজ কতদূর এগুলো ? আর কতক্ষণ দেরি হবে ?
- হাফিজ :** প্রায় হয়ে এল বলে। এতক্ষণে সব চুকে দু-একটা বেজে যেত। গোলমালে কাজে বাধা না পড়লে-কখন সব শেষ করে ফেলতাম-
- নেতা :** গোলমাল ! এখানেও গোলমাল ? গোরস্থানের মূর্দারাও মিছিল করতে শিখেছে নাকি ?
- হাফিজ :** কী যে বলেন স্যার ! ঐ গোর-খুঁড়েগুলো দু-একটা আপত্তি তুলেছিল, সেটা মেটাতে একটু দেরি হয়ে গেল।

- নেতা :** আপত্তি ? টাকা-পয়সা নিয়ে আপনি কোনো গোলমাল করেননি তো ? আপনাকেও বলেছি যে, টাকার জন্য চিন্তা করবেন না। যা দরকার তার চেয়েও বেশি ছড়িয়ে যান। সরকারের অনুমোদন আমি যোগাড় করে দেব। টাকা ঢালতে আপনার কষ্ট হয় কেন ? কমতি পড়লে আপনি আমার কাছে চেয়ে নিতেন।
- হাফিজ :** সে কি স্যার আমি বুঝিনি ? সরকারের কাজে সরকারি টাকা খরচ করতে আমি পেছ-পা হব কেন ? তবে ঐ ছোটলোকগুলোর আবার অস্বস্ত সব ধর্মীয় কুসংস্কার রয়েছে কিনা তাতেই যত ফঁকড়া বাধে। মুজুরি তো ষোল আনা আদায় করবেই, তার ওপর ধর্মের নাম করে সাত রকম ফর্সিফর্সি। কুসংস্কারই দেশটাকে খেল স্যার !
- নেতা :** আমার বক্তৃতা আমাকে শোনাবেন না। আসলে কী ঘটেছে তাই বলুন।
- হাফিজ :** হাসপাতাল থেকে লাশগুলো তাড়াহুড়ো করে টেনেহেঁচড়ে গাড়িতে তুলতে হয়েছে। তার ওপর এতখানি পথ ট্রাকে আনা, ঝাঁকুনি কিছু কম খায়নি। আর ডাক্তারগুলোও যেমন পশু, মড়াগুলোকে কেটে-কুটে একেবারে নাশ করে রেখেছিল।
- নেতা :** এসব কাজে নার্ভাস হলে এত বড় প্রতিষ্ঠানের নেতা হতে পারতাম না। তবু আপনাকে বলেছি আমার হার্ট একটু উইক। বেশি স্ট্রেইন সহ্য হয় না। বাজে কথা না য়েঁটে আসল কথাটা বলুন।
- হাফিজ :** যা হবার তাই হয়েছে। টানা-হেঁচড়ায় আর ট্রাকের ঝাঁকুনিতে গাড়ির মধ্যেই লাশগুলো একেবারে তালগোল পাকিয়ে গিয়েছিল। কাটা টুকরাগুলো এলোমেলো হয়ে যাওয়ায় এখন আর বোঝবার উপায় নেই, কোনটার সঙ্গে কোনটা যাবে।
- নেতা :** তাতে কী হয়েছে ? (নতুন বোতল খুলিবে)
- হাফিজ :** আরেকটা খাচ্ছেন স্যার ? মানে, তাই দেখে আমি গোর-খুঁড়েগুলোকে বললাম, আলাদা আলাদা করে অভগুলো কবর বানিয়ে কী দরকার। একটা বড়-মতোন গর্ত করে সবগুলো তার মধ্যে ঠেসেঠেসে পুরে মাটি চাপা দিয়ে দিলেই হয়।
- নেতা :** Resourceful officer ! আপনার নামটা মনে রাখতে হবে। সকাল বেলায়ই একবার পার্টি হাউসে আসবেন, রিকমেন্ডেশন লিখে দেব।
- হাফিজ :** মেহেরবানি স্যার। পাকিস্তান হবার পর আমরা পেটি-অফিসাররাই কেবল কিছু পেলাম না। বৃটিশ আমলেও সমাজে মিশতে পারিনি। পাকিস্তানের জন্য এত ফাইট করে আমাদের এখনও সেই দশা। যদি আপনারাও আমাদের দিকে ফিরে না তাকান আমরা বাঁচব কী করে ? আমাদের তো কোনো রাজনীতি নেই স্যার ! সরকারই মা-বাপ ! যখন যে দল হুকুমত চালায় তার হুকুমই তামিল করি।
- নেতা :** এর মধ্যে গোলমালটা কিসের ? আপত্তি উঠল কোথায় ?
- হাফিজ :** এ্যা ? ওহ্। ইয়ে-মানে, ঐ গোর-খুঁড়ে। বজ্জাত ব্যাটারা বলে কিনা 'কভি নেহি'। বলে কিনা 'মুসলমানের মুর্দা, দাফন নেই, কাফন নেই, জানাজা নেই? তার ওপর একটা আলাদা কবর পর্যন্ত পাবে না ? এ হতে পারে না, কভি নেহি।' গো ধরে বসে রইল। কত বোঝালাম।
- নেতা :** আহাম্মকি করেছেন। সরকারি কাজ করেন কিনা ! পাবলিক সেন্টিমেন্ট বোঝেন না। বোঝাতে গিয়ে সময় নষ্ট না করে ওদের খুশিমতো কাজ করতে দিলে আপনার ইজ্জত ডুবত ? কাজ আদায় করা নিয়ে আপনার কারবার। সমাজ সংস্কারের বক্তৃতা দেবার জন্য আপনাকে সরকার বেতন দেয় না। আর ঘণ্টাখানেকের মধ্যে আকাশ ফরসা হয়ে যাবে-আযান পড়বে-কারফিউ শেষ হবে। লাশগুলো

নিয়ে আপনি এখনও মিটিং করছেন ?

হাফিজ : আমি সঙ্গে সঙ্গে ওদের কথায় রাজি হয়ে গিয়েছিলাম ।

নেতা : তাহলে এতক্ষণ দেরি হচ্ছে কেন ?

হাফিজ : ঐ তখনই তো স্যার আরেকটা নতুন ফ্যাকড়া বাধল । কোথ থেকে ছুটে এসে ঐ মূর্দা ফকির চ্যাচামেচি শুরু করে দিল ।

নেতা : কে ? আপনাকে এতবার করে বলেছি, দমকা দমকা একেকটা উম্মট কথা আমাকে বলবেন না । ধড়াক করে বুক লাগে । যা বলবার তা অত নাটক করে টিপে টিপে না বলে খোলাখুলি প্রথমেই সবটা বলে ফেলতে পারেন না ? (বুকে হাত বুলাইয়া) এই মূর্দা ফকিরটি কে আবার ? কবর ফুঁড়ে বেরিয়েছে নাকি? কারফিউর মধ্যে এখানে ঢুকল কী করে ? গার্ডগুলো কী করছিল ?

হাফিজ : এখানেই থাকে স্যার । গোরস্থানের বাইরে কখনও যায় না বলেই তো ওই নাম । দিনরাত এখানেই পড়ে থাকে । মাঝে মাঝে কবরের সঙ্গে আলাপ করে । পাগল ! বন্দু পাগল !

নেতা : হুম !

হাফিজ : লোকটা এমনিতেই ভালো লেখা পড়া জানে । ভালো আলেম । গ্রামের স্কুলে মাস্টারি করত । তেতাল্লিশের দুর্ভিক্ষে চোখের সামনে ছেলে-মেয়ে, মা-বৌকে মরতে দেখেছে । কিন্তু কাউকে কবরে যেতে দেখেনি । মূর্দাগুলো পচেছে । শকুনে খুবলে দিয়েছে । রাতের বেলায় শেয়াল এসে টেনে নিয়ে গেছে । সেই থেকে পাগল । গোরস্থান থেকে কিছুতেই নড়তে চায় না । বলে, মরে গেলে কেউ যদি কবর না দেয় । মরার সময় হলে, কাছাকাছি থাকব, চট করে যাতে কবরে ঢুকে পড়তে পারি । বড় ট্রাজিক স্যার !

নেতা : অনেক খবর রাখেন দেখছি ।

হাফিজ : চাকরি । চাকরি স্যার । চারদিকের হরেক রকমের খোঁজ আমাদের রাখতে হয় স্যার ।

নেতা : বেশি খোঁজাখুঁজি করতে গিয়ে নিজের বুদ্ধিটাই কোথায় যেন খুইয়ে এসেছেন । মেহেরবানি করে তাড়াতাড়ি বলবেন কি, গোলমালটা কিসের ? লাশগুলো মাটিচাপা দিতে এত দেরি হচ্ছে কেন ? ঠাণ্ডায় আপনার মগজ জমে গেছে । কেবল এলোমেলো বকছেন । নিন । (বোতলটা আগাইয়া দিয়া) এক চুমুক টেনে নিন । শরীর গরম হবে । বুক সাহস পাবেন । কথা গুছিয়ে বলতে পারবেন । নিন ।

হাফিজ : আপনার সামনে স্যার ? তার ওপর স্যার এখন অন ডিউটি—

নেতা : তাকানোর সময় নেই । লাশগুলো মাটিচাপা দিয়ে কারফিউ শেষ হবার আগে আমাদের এখান থেকে সরে পড়তে হবে । ঢিলেমির এটা সময় নয় । ধব্বুন । এক চুমুক টেনে চটপট কাজটা শেষ করে ফেলুন ।

হাফিজ : বোতলে মুখ লাগিয়ে খাব স্যার ?

নেতা : কেন, চুসনি লাগিয়ে দিতে হবে নাকি ?

(হাফিজ বোতলটা মুখে লাগাইয়া চোঁ চোঁ করিয়া টানে টানে একদম খালি করিয়া ফেলিল । ঢক করিয়া বোতলটা মাটিতে রাখিয়া চোখ বড় করিয়া এক মুহূর্ত থম্ ধরিয়া থাকে । তারপর আকর্ণ বিস্তৃত হাসিতে উদ্ভাসিত হইয়া—)

হাফিজ : এই মালটা স্যার আরও ভালো । একেবারে কলজেয় গিয়ে ঘা মারে ।

নেতা : মূর্দা-ফকির লাশগুলো দেখেছে ?

- হাফিজ :** এ্যা ! ওহ্ হ্যাঁ, মানে, না। বোধ হয় দেখিনি। ও ব্যাটার চলাফেরা কিছু ঠাণ্ডা করা যায় না। কোথথেকে হঠাৎ হুস্ করে একেবারে সামনে এসে পড়ে। বোধ হয় আড়াল থেকে গোর-খুঁড়েদের সঙ্গে আমার কথাবার্তা শুনে থাকবে। আচমকা পেছন থেকে লাফিয়ে পড়ল। ঠিক আমাদের মাঝখানে। তারপর কী তুখোড় বক্তৃতা। আমি তো গোর-খুঁড়েদের কথা মেনেই নিয়েছিলাম। এ-ব্যাটাই না কোথথেকে উড়ে এসে ওদের বোঝাতে শুরু করল : কিছুতেই না, একটা কবরেই কাজ সারতে হবে। যে হারে মানুষ মরছে তাতে নাকি শেষটায় ওর কবরের বাজারে ঘাটতি পড়ে যেতে পারে। দেখুন তো কী সব বিদঘুটে কথা !
- নেতা :** ওকে সুন্দ পুঁতে ফেললেন না কেন ?
- হাফিজ :** কী যে বলেন স্যার। মন ভুলিয়ে কাজ আদায় হলে জানে মেরে ফয়দা কী ? পাগলা আদমি, একটু তাল দিয়ে কথা বলতেই শুড় শুড় করে আমার সঙ্গে চলে এল। ওকে ওই দিকে পার করে দিয়ে আমি পাহারা দিছিলাম, যেন আবার হামলা না করে। আর এই শালারাও সেই কখন থেকে শাবল চালাচ্ছে, এখনও নাকি খোঁড়াই শেষ হল না। (ঘড়ি দেখিয়া) এতক্ষণে নিশ্চয়ই প্রায় হয়ে এসেছে।
- নেতা :** (গ্লাসে চুমুক দিয়া) না। কাজটা ঠিক হয়নি। এসব ফকির দরবেশ বড় ধড়িবাজ লোক হয়। কোথথেকে কী উৎপাত সৃষ্টি করবে কে জানে।
- হাফিজ :** লাশ ও ব্যাটা দেখিনি। দেখলেও কিছু বুঝতে পারত না। রক্ত-মাংসের সতুপ দেখে ও কী বুঝবে ? এ রকম লাশ তো ট্রেনে-চাপা মড়ারও হতে পারে।
- নেতা :** গুলি চলছে দুপুর বেলা। খবর দেশময় ছড়িয়ে পড়েছে সঙ্গে সঙ্গে, এফোড়-ওফোড়। ফকির হোক পাগল হোক-শহরে থেকেও এ খবর ওর কানে পৌঁছেনি, তা ভাবতে আমি রাজি নই। এসব খবর ঝড়ো হাওয়ার মুখে আগুনের ফুলকির মতো ছড়িয়ে পড়ে।
- হাফিজ :** মূর্দা-ফকির ঝড়ও বোঝে না, আগুনও বোঝে না। ওতো এক রকম কবরের বাসিন্দা। ভাষার দাবিতে মিছিল বেরিয়েছিল বলে পুলিশ গুলি করে কয়েকটাকে খতম করে দিয়েছে-এত কথা বোঝবার মতো জ্ঞান-বুদ্ধি ওর নেই। লাশ দেখলেই ও মুখের মধ্যে ভাত গুঁজে দিতে চায়-কারণ ওর ধারণা, মানুষ শুধু এক রকমেই মরতে পারে-খেতে না পেয়ে। পাগল, বন্ধ পাগল !
- নেতা :** কিন্তু লাশগুলোকে কোথায় কবর দেওয়া হচ্ছে তা তো ও দেখেছে। সকাল বেলা যদি কাউকে আজুল দিয়ে জায়গাটা দেখিয়ে দেয় ? লাশ নিয়ে মিছিল করতে না পেরে ক্ষেপে গিয়ে সকাল বেলা যদি ছাত্ররা এখানেও খোঁজ করতে আসে ?
- হাফিজ :** আপনারা লিডার। অনেক দূর ভাবেন। আমরা পেটি অফিসার, হুকুম তামিল করেই খালাস। কী করতে হবে ? (সতৃষ্ণতা)
- নেতা :** ওটাকে সুন্দ পুঁতে দাও।
- হাফিজ :** এ্যা ? কী বলছেন স্যার ? আপনি এক্সাইটেড হয়ে গেছেন স্যার। আর খাবেন না এখন।
- নেতা :** আমার মাত্রা আমি জানি। পুঁতে ফেল। দশ-পনের-বিশ-পঁচিশ হাত। যত নিচে পার। একেবারে পাতাল পর্যন্ত খুঁড়তে বলে দাও। পাথর দিয়ে, মাটি দিয়ে, ভরাট করে গৌঁথে ফেল। কোনোদিন যেন আর ওপরে উঠতে না পারে। কেউ যেন টেনে ওপরে তুলতে না পারে। যেন মিছিল করতে না পারে, স্লোগান তুলতে না পারে, যেন চ্যাঁচাতে ভুলে যায়।
- হাফিজ :** আপনি বড় এক্সাইটেড স্যার। এ-সব কাজ বড় সূক্ষ্ম স্যার। এক্সাইটমেন্ট সব পণ্ড করে দিতে পারে। আমাদের ট্রেনিংই এ জন্য অন্যরকম। কোনো সময়ই আমাদের উত্তেজিত হতে নেই। ভান

করতে পারি কিন্তু আসলে উত্তেজিত নই।

নেতা : পুঁতে ফেল।

হাফিজ : ভুল, খুব ভুল হবে। যা-ই করতে হয় স্যার খুব কুলুলি করতে হবে। এসব আমাদের রীতিমত প্রাকটিস করে আয়ত্ত করতে হয়েছে। এতে কাজ হয়। আমি একবার ঐ দিকটা দেখে আসি। এত দেরি হচ্ছে কেন বুঝতে পাচ্ছি না।

নেতা : যান, তাড়াতাড়ি যান। আপনার কথা শুনতে শুনতে কানে তালা লেগে গেছে। নেশাটা পর্যন্ত জমতে পারছে না। আর বেশিক্ষণ আপনাকে দেখলে, আপনাকে সুন্দর পুঁতে ফেলতে ইচ্ছে হবে।

হাফিজ : এ্যা ! ওহ্-হে হে হে ! আপনার কথা শুনলে হাসি পায় ঠিক-কিন্তু, মানে পিলে পর্যন্ত চমকে ওঠে স্যার। বুকটা ধড়ফড় করে উঠেছে। উঠতে গিয়ে মনে হল যেন পড়ে যাব। বড্ডো ভয় পেয়ে গেছি স্যার। আরেকটু দেবেন স্যার ? খেলে একটু মনে সাহস আসবে। তাড়াতাড়ি গুছিয়ে কাজ করতে পারব। এই নতুন বোতলটা কেমন স্যার ?

নেতা : (চোখ তুলিয়া) আপনার মাত্রা আমার জানা নেই। এই দফায় একটু কমিয়ে দিলাম। (গ্লাসে কিছুটা ঢালিয়া বোতলটা তুলিয়া দিলেন।)

(নিঃশব্দে পিছনে আসিয়া দাঁড়াইয়াছে মূর্দা ফকির। কেহ তাহাকে দেখে নাই। সর্বাঙ্গ কম্বলে ঢাকা। রুম্ব ময়লা চুল। তীক্ষ্ণ কোটরাগত চক্ষু জ্বলিতেছে। হাফিজ ও নেতা বোতল ও গ্লাস চুমুকে শেষ করিয়াছে।)

ফকির : (হাফিজের কাঁধে হাত দিয়া) ঝুঁটা! (হাফিজ ও নেতা সভয়ে চিৎকার করিয়া উঠে। নেতা দুর্বল হৃৎপিণ্ড চাপিয়া ধরে।)

নেতা : কে ?

হাফিজ : এ্যা ! ওহ্ আপনি ? হঠাৎ অন্ধকারে চিনতে পারিনি হুজুর।

ফকির : ঝুঁটা। মিথ্যাবাদী। আমাকে চিনতে পারে না। এ গোরস্থানে এমন কেউ নেই। জিন্দা-মূর্দা কেউ না। জিন্দা আর মূর্দায় পার্থক্য বোঝা ? দেখলে চিনতে পারবে ?

হাফিজ : সে হুজুর আপনার দোয়ায়।

ফকির : ঝুঁটা ! তুমি কোনো পার্থক্য বোঝ না, কিছু চেন না। তুমি বাঁচার না-লায়েক। তোমার মতো জিন্দা আদমিকে কেউ দোয়া করে না। পাগলেও না। তুমি আমাকে ধোঁকা দিয়েছ। আমি ওদের ভালো করে দেখেছি, ওরা মূর্দা নয়। মরেনি। মরবে না। ওরা কখনও কবরে যাবে না। কবরের নিচে ওরা কেউ থাকবে না। উঠে চলে আসবে।

হাফিজ : আপনি তো এইদিকে ছিলেন। ওদিকে গেলেন কখন ?

ফকির : বাবা ! তোমরা শহরের অলি-গলি যেমন চেন, এ গোরস্থান আমার তেমনি চেনা। এখানে কবরের নিচ দিয়ে সুড়ং আছে। আমি তৈরি করেছি। নইলে তোমাদের সঙ্গে পারব কেন ?

হাফিজ : হো হো হো। আপনি বড় মজার কথা বলেছেন হুজুর।

ফকির : এই তো ঠিক বুঝতে পেরেছ বাবা। তুমি আমায় ফাঁকি দিতে চেয়েছিলে। ভেবেছিলে পাসপোর্ট না করিয়েই ওপার চালান করে দেবে। পরীক্ষা না করে কি আর আমি এমনি যেতে দি !

হাফিজ : সালাম হুজুর। আপনি বুঝি এখানকার পাসপোর্ট অফিসার ? মাফ করে দিন হুজুর, এতক্ষণ চিনতে পারিনি।



- ফকির :** সাবাস বেটা। তোর নজর খুলছে।
- হাফিজ :** তা হুজুর এখন অনুমতি দিন, ওদের পার করে দি।
- ফকির :** না। আমি প্রথমেই সন্দেহ করেছিলাম একটা কিছু গোলমাল নিশ্চয়ই আছে। তাই না চুপে চুপে সুড়ং দিয়ে ঢুকে এক্কেবারে তোদের ঢাকা মোটর গাড়ির ভেতর গিয়ে উঠলাম।
- নেতা :** ইমপেক্টর !
- ফকির :** প্রথমে দেখে মনে হল ঠিকই আছে। উন্টেপাল্টে দেখি, কোনোটার বুকের কাছে এক খাবলা গোস্ত নেই, কোনোটার ফাঁটা খুলি দিয়ে কী সব গড়িয়ে পড়ছে, ভাবলাম ঠিকই আছে। কবরের কাবেল। কিছু নয়, শেয়াল-শকুনে খামচে কামড়ে একটু খারাপ করে গেছে। তারপর হঠাৎ খেয়াল করে দেখি-না তো, ঠিক তো নেই। উহুম্।
- হাফিজ :** সে কি হুজুর। ঠিক। সব তো ঠিকই আছে।
- ফকির :** চোপরও। ঠিক নেই। গন্ধ ঠিক নেই। তোমরা চোরাকারবারি। আমি শূঁকে দেখেছি, গন্ধ ঠিক নেই।
- হাফিজ :** গন্ধ ?
- ফকির :** বাসি মড়ার গন্ধ আমি চিনি না ? এ লাশের গন্ধ অন্য রকম। ওষুধের, গ্যাসের, বাবুদের গন্ধ। এ মুর্দা কবরে থাকবে না। বিশ-পঁচিশ-ত্রিশ হাত যত নিচেই মাটি চাপা দাও না কেন- এ মুর্দা থাকবে না। কবর ভেঙে বেরিয়ে চলে আসবে। উঠে আসবে।
- হাফিজ :** ওহু ! তাহলে বলুন, কবর দেওয়া হয়ে গেছে। থাক। গন্ধ থাকুক। মাটির নিচ থেকে নাকে লাগবে না।
- ফকির :** ওরা জোর করে কবর দিয়ে দিল। আমায়ও বলল না। আমিও তোমাদের কথা মানবো না। ও মুর্দা কবরের নয়। আমি ওদের ডেকে তুলে নিয়ে চললাম।
- হাফিজ :** খোদা হাফেজ।
- (ফকির কিছুদূর যাইয়া আবার ফিরিয়া আসে। টানিয়া টানিয়া চারিদিক হইতে কী গুঁকিতে চেষ্টা করে। নিজের শরীরও গুঁকিয়া দেখে।)*
- ফকির :** নাহু, আমার গায়ের গন্ধ নয়। দেখি-(আগাইয়া আসিয়া একবার হাফিজের গা গুঁকিবে। তারপর ঝুঁকিয়া হাফিজের মুখের ঘ্রাণ নিয়াই জ্বলজ্বলে চোখ বিস্ফোরিত করিয়া দেয়। ছুটিয়া নেতার মুখের ঘ্রাণ নেয়। মুখ-চোখ অধিকতর উজ্জ্বল করিয়া) উহু ! তাই বল ! এইবার পেয়েছি। ব্যাটারী কী ভুলই না করেছে।
- নেতা :** ইমপেক্টর, লোকটাকে দূর করে দাও এখন থেকে।
- ফকির :** গন্ধ ! তোমাদের গায়ে মরা মানুষের গন্ধ ! তোমরা এখানে কী করছ ? যাও, তাড়াতাড়ি কবরে যাও। ফাঁকি দিয়ে ওদের পাঠিয়ে দিয়ে নিজেরা বাইরে থেকে মজা লুটতে চাও, না ? না, না। আমার রাজ্যে এসব চলবে না। (গন্ধ গুঁকে) তোমাদের গায়ে মুখে পাই মড়ার গন্ধ। তোমাদের সময় হয়ে গেছে। ছিঃ, এরকম ফাঁকি দেয় না। আমি ওদের তুলে নিয়ে আসছি, তোমরা তৈরি হয়ে নাও। ইস্ ! গোর-খুঁড়েরা কী ভুলই না করেছে ! না, না এ তো হতে পারে না-
- (বিড়বিড় করিতে করিতে ফকিরের প্রস্থান। মধ্যে বিমূঢ় নেতা। হাফিজ হাসিতেছে। প্রাণ খুলিয়া হাসিয়া লইতেছে। সাফল্যের হাসি। পানাদিক্য হেতু কিঞ্চিৎ বেসামাল।)*

**হাফিজ :** হে হে হে হে স্যার। সব খতম স্যার। আমরা এখন ফ্রি। দেখলেন তো, পাগলটাকে কী রকম পোষ মানালাম। পাগলটাকে অত হুজুর হুজুর না বললে হয়ত গাঁয়ের দিকেই ছুটত। আর শরীরটা অনেকক্ষণ থেকেই এমন নড়বড়ে মনে হচ্ছে যে, এর ওপর এখন কিছু এসে পড়লে পান্তা পাওয়া যেত না।

**নেতা :** ভালো হত। তুলে নিয়ে আপনাকে সুন্দর পুঁতে ফেলার ব্যবস্থা করতাম।

**হাফিজ :** ঐ একটা নোংরা কথা বারবার বলবেন না, স্যার। তাহলে আমিও আপনার সম্পর্কে দু'একটা হক কথা বলে ফেলব কিন্তু।

**নেতা :** যেমন ?

**হাফিজ :** যেমন ? বেশ। একটা বলছি। আমাকে তুলে নিয়ে যাবার মতো ক্ষমতা বা অবস্থা আপনার এখন নেই। আপনি এখন নিজেকে নিজে খাড়া রাখতে পারলেই প্রচুর হাততালি পাবেন। বক্তৃতা না করলেও হাততালি দেব।

**নেতা :** মারহাবা ! সাবাস ! খুব ধরেছেন। ডিপার্টমেন্টের মুখ উজ্জ্বল করবেন একদিন। একবারও তো ঠিক মতো উঠে দাঁড়াইনি, ধরে ফেললেন কী করে ?

**হাফিজ :** অনেক দিন হল এ লাইনে আছি স্যার, এতটুকু বুঝব না ?

**নেতা :** সবটা ঠিক ধরতে পারেননি। উঠতে হয়ত কষ্ট হবে, কিন্তু বক্তৃতা আমি ঠিক দিতে পারব। কী, বিশ্বাস হয় না বুঝি ?

**হাফিজ :** বিশ্বাস ? হ্যাঁ ! পারবেন। তা পারবেন। আমি, আমি মানে আমার ব্রেনটাও ঠিক আছে। যেকোনো পরিস্থিতিতে এখনও আমার ডিউটি ঠিক করে যেতে পারব। তবে, তবে মানে এই চোখ, আর কান খামোখাই একটু বেশি কাজ করছে বলে ভয় হচ্ছে।

**নেতা :** ভয় ? ভয় কিসের ? তুমি মনে করেছ ঐ মূর্দা ফকিরের কথায় আমি ডরাই ? এখান থেকে যাওয়ার আগে ওটাকে মূর্দা বানিয়েই যাব। কোথাকার আমার জিন্দা পীর এসেছেন-ওর কথায় গোর থেকে লাশ উঠে আসবে।

**হাফিজ :** কিছু মনে করবেন না স্যার। একটা সওয়াল পুছ করছি আপনাকে। মনে করেন, সত্যি যদি ঐ মূর্দা ফকির লাশগুলোর একটা মিছিল নিয়ে এসে দাঁড়ায়-কী করবেন তখন আপনি ?

**নেতা :** সব্বাইকে, আপনাকে সুন্দর, একসঙ্গে পুঁতে ফেলতাম।

**হাফিজ :** আমি কিন্তু আপনার সঙ্গে রসিকতা করিনি। ঐ মূর্দা ফকির শুনেনি অনেক কিছু জানে। কিন্তু যদি আসেও, আমি ভয় পাই না। একটুও না। প্রথমে হাসব। দেখব। এগিয়ে যাব। হাত মেলাবো। ভয় কিছুতেই পাব না। (নিজের গলা দুই হাতে সজোরে টিপিয়া ধরিয়া) গ...লা টিপে ধরে রাখব। যাতে বুকের মধ্যে ভ...য় কিছুতেই ঢুকতে না পারে। আরেকটু দেবেন স্যার ? বুক সাহস আসবে। কেমন জানি ইয়ে করছে।

(ততক্ষণে পার্টিশানের ঐ পাশ হইতে সকলের অলক্ষ্যে ক্রমোজ্জ্বলিত আলোকশিখার কম্পিত গোলকের মধ্যে একটি ভয়াবহ মুখ ভাসিয়া উঠিয়াছে। সমস্ত বদনমণ্ডল পরিবেষ্টিত করিয়া রক্তাক্ত ব্যাভেজ মূর্তি নিশ্চল। নেতা যখন শেষবারের মতো ইন্সপেক্টরকে পানীয় দিবার জন্য গ্লাসে বোতল উপুড় করিয়া ধরিয়াছেন, তখন ঐ স্তব্ধ মূর্তির একটি প্রায় অদৃশ্য হাত অন্ধকার হইতে কী যেন ছুঁড়িয়া মারিল। কাচের গ্লাসের বান্ বান্ শব্দ। নেতা ও হাফিজের ভয়ার্ত অস্ফুট চিৎকার !)

- হাফিজ : গুলি ! গুলি স্যার ! শূয়ে পড়ুন শিগগির ! গুলি !  
(দুইজনে উপড় হইয়া শুইয়া পড়ে । পশ্চাতে কম্পিত শিখায় নিম্পন্দ মুখ । কয়েক মুহূর্তের সুতীব্র স্তব্ধতা ।)
- নেতা : (চাপা স্বরে) গুলি যে বুঝলে কী করে ?
- হাফিজ : দেখেছি !
- নেতা : কে ছুঁড়েছে তুমি দেখেছ ?
- হাফিজ : না । তবে কী ছুঁড়েছে দেখেছি ।
- নেতা : কোথায় ?
- হাফিজ : বেশি নড়বেন না । খুঁজে দেখছি পাই কিনা । (উপড় হইয়া একটু চারিদিকে হাতড়ায় । হঠাৎ কী তুলিয়া দেখে) ধরুন, পেয়েছি ।
- নেতা : (হাতে লইয়া) এ কী ? এ যে বুলেট ! রক্তমাখা !
- হাফিজ : কুল্লি ! কুল্লি ! ভয় পাবেন না স্যার । ভয় পেলেই সব গেল । এ নিশ্চয়ই ঐ মূর্দা ফকিরের কাণ্ড । ট্রাকের ভেতর ঢুকে লাশের গা থেকে হয়ত খুলে নিয়ে এসেছে । সেগুলোই ছুঁড়ে মেরে এখন আমাদের ভয় দেখাচ্ছে ।
- নেতা : ও ! তাহলে বল- কিছু না । মূর্দা ফকির-সে তো জ্যান্ত আদমি । বড় ভয় পেয়ে গিয়েছিলাম ।
- হাফিজ : এখন উঠে পড়া যাক স্যার । মিছেমিছি ভয় পেয়ে লাভ কী !
- নেতা : ইমপেক্টর !
- হাফিজ : জী ।
- নেতা : আমার কেমন যেন মনে হচ্ছে-যে মেরেছে, সে এখনও আমাদের পেছনে দাঁড়িয়ে রয়েছে ।
- হাফিজ : এঁয়া !
- নেতা : তুমি একটু ঘুরে একবার দেখ তো । আমিও তাকাচ্ছি ।
- হাফিজ : (ধীরে মাথা ঘুরাইয়া দেখে সর্বাঙ্গ শিহরিয়া উঠে । আশ্রয় চেষ্টায় অস্বাভাবিক স্থির কণ্ঠে) উঠে এসেছে ।
- নেতা : কে ?
- হাফিজ : সেই লাশটা ।
- নেতা : লাশ ! কোন লাশটা ?
- হাফিজ : বুলেট খাওয়া । ছাত্র । খুলি নেই ।
- নেতা : ওহ ! কী চায় ?
- হাফিজ : চুপচাপ দাঁড়িয়ে আছে । জিজ্ঞেস করে দেখব ?
- নেতা : কী জিজ্ঞেস করবে ?
- হাফিজ : এই, কী চায়, কেন উঠে এসেছে, ঠান্ডা লাগছে নাকি-এই সব ?

- নেতা : আমাদের কথা বুঝবে ?
- হাফিজ : ট্রাই করতে হবে। সব লাইনেই ট্রাই করতে হবে। এটা একটা নতুন সিচুয়েশান স্যার। কুল্লি অগ্রসর হতে হবে। ঘটনা হিসেবে এটা অবাস্তব হতে বাধ্য। কিন্তু, অন্য রকম হলেও আমাদের ভয় পেলে চলবে না। ফেইস করতেই হবে। (উঠিয়া দাঁড়াইবে। বেশ কষ্ট। নাটুকে মাতালের টলায়মান অবস্থা নয়, তবে নেশা যে উভয়েরই খুব গাঢ় হইয়াছে তাহা স্পষ্ট।)
- নেতা : আপনি কিছু ভয় পাবেন না। আমি পেছনে রয়েছি। পিস্তলের টিপ আমার পাক্সা।
- হাফিজ : খবরদার। অমন কাজও করবেন না। (ফিস্‌ফিস্‌ করিয়া) পিস্তলের কেস এটা নয় স্যার। বুঝতে পারছেন না-এটা-ঠিক মানে, অন্য জিনিস, মানুষ নয়। পিস্তল রেখে দিন। লক্ষ করুন, আমি কী রকম সামলে নিচ্ছি। একটু আলাপ করতে পারলেই পোষ মানিয়ে নেব। (ধীরে ধীরে আগাইয়া মূর্তির নিকট আসে। বাতাসে টানিয়া টানিয়া স্পর্শ করিতে চেষ্টা করে।) এই! এই! আমার কথা শুনতে পাচ্ছ? এই! হেই! (মূর্তি নীরব। নিশ্চল।) (ঘুরিয়া) স্যার, কোনো সাড়া দিচ্ছে না যে?
- নেতা : বোধ হয় আমাদের সঙ্গে দেখা করতে আসেনি। আমাদের সঙ্গে হয়ত কোনো কাজ নেই। ভালো। তা ভালো। ও থাকুক। আমরা চল আমাদের কাজে যাই।
- হাফিজ : তা হয় না স্যার। ওকে এখানে দাঁড় করিয়ে আমরা চলে যাব? তা হয় না স্যার। আমার ডিউটি আমাকে করতেই হবে। ওকে ফেরত না পাঠিয়ে আমরা চলে যেতে পারি না, স্যার।
- মূর্তি : আমি যাব না। আমি থাকব। (দু'জনে হতবাক। ধীরে ধীরে হাফিজ আগাইয়া যায়।)
- হাফিজ : কোথায় যাবে না? কোথায় থাকবে?
- মূর্তি : কবরে যাব না। এখানে থাকব।
- হাফিজ : অবুঝের মতো কথা বল না। তোমাদের এখন এখানে আর থাকতে নেই। তোমরা মরে গেছ। অন্যখানে তোমাদের জন্য নতুন জায়গা ঠিক হয়ে গেছে। সেখানেই এখন তোমাদের চলে যাওয়া উচিত।
- মূর্তি : মিথ্যে কথা। আমরা মরিনি। আমরা মরতে চাইনি। আমরা মরব না।
- হাফিজ : (নেতার কাছে আসিয়া) বড় একগুঁয়ে স্যার। আলাপ করে সুবিধে হবে, মনে হচ্ছে না। একটা বক্তৃতা দিয়ে দেখবেন স্যার? যদি কিছু আছর হয়। পারবেন না স্যার? আপনি তো বলেছিলেন- যাই হোক-বক্তৃতা দিতে আপনার কোনো কষ্ট হবে না। একবার ট্রাই করুন না স্যার।
- নেতা : (ভালো করিয়া গুনিয়া) দেখ ছেলে, আমার বয়স হয়েছে। তোমার মুরবিররাও আমাকে মানে। বহুকাল থেকে এ দেশের রাজনীতি আঙুলে টিপে টিপে গড়েছি, শেপ দিয়েছি। কওমের বৃহত্তম রাজনৈতিক প্রতিষ্ঠানের, বলতে পার, আমিই একচ্ছত্র মালিক। কোটি কোটি লোক আমার হুকুমে ওঠে, বসে-
- মূর্তি : কবরে যাব না।
- নেতা : আগে কথাটা ভালো করে শোন। তুমি বুদ্ধিমান ছেলে, শিক্ষিত ছেলে। চেষ্টা করলেই আমার কথা বুঝতে পারবে। বিশ্ববিদ্যালয়ের সবচেয়ে উঁচু ক্লাসে উঠেছ। অনেক কেতাব পড়েছ। তোমার মাথা আছে।
- মূর্তি : ছিল। এখন নেই। খুলিই নেই। উড়ে গেছে। ভেতরে যা ছিল রাস্তায় ছিটকে পড়ে নষ্ট হয়ে গেছে।
- নেতা : জীবিত থাকতে তুমি দেশের আইন মানতে চাওনি। মরে গিয়ে তুমি এখন পরপারের কানুনকেও অবজ্ঞা করতে চাও। কম্যুনিজমের শ্রোতা তুমি তোমাকে ভর করেছে, তাই মরে গিয়েও এখন তুমি কবরে যেতে চাও না। তোমার মতো ছেলেরা দেশের মরণ ডেকে আনবে। সকল সর্বনাশ না দেখে তুমি

বুঝি কবরে গিয়েও শান্ত থাকতে পারছ না। তোমাকে দেশের নামে, কওমের নামে, দীনের নামে, যারা এখনও মরেনি-তাদের নামে-মিনতি করছি-ভুমি যাও, যাও, যাও !

**মূর্তি** : আমি বাঁচব।

**নেতা** : কী লাভ তোমার বেঁচে ? অশান্তি ডেকে আনা ছাড়া তোমার বেঁচে কী লাভ ? তুমি বেঁচে থাকলে বারবার দেশে আগুন জ্বলে উঠবে। সব কিছু পুড়িয়ে ছারখার না করে সে আগুন নিভবে না। তার চেয়ে ভুমি লক্ষ্মী ছেলের মতো কবরে চলে যাও। দেখবে, দুদিনে সব শান্ত হয়ে যাবে। দেশে সুখ ফিরে আসবে। (মূর্তি মাথা নাড়ে) আমি ওয়াদা করছি, তোমাদের দাবি অক্ষরে অক্ষরে আমরা মিটিয়ে দেব। তোমার নামে মনুমেন্ট গড়ে দেব। তোমার দাবি এ্যাসেম্বলিতে পাস করিয়ে নেব। দেশজোড়া তার জন্য প্রচারের ব্যবস্থা করব। যা বলবে তাই করব। দোহাই তোমার, তবু অমন সত্ব্ব পাথরের মূর্তির মতো, আকাশ ছোঁয়া পাহাড়ের মতো নিশ্চল হয়ে দাঁড়িয়ে থেক না। সরে যাও, চলে যাও, অদৃশ্য হয়ে যাও।

(সর্বাপেক্ষে কাফনের কাপড় জড়াইয়া আর একটি মূর্তি নিঃশব্দে মাথা তুলিয়া দাঁড়াইয়াছে। চুলে রক্ত মাথা। মুখে আঘাতের চিহ্ন। ঠোঁটের দুই পাশে বিষুঙ্ক রক্তরেখা।)

কে ? তুমি কে ?

**মূর্তি (২)** : নাম বললে চিনতে পারবেন না। হাইকোর্টের কেরানি ছিলাম। তখন টের পাইনি। ফুসফুসের ভেতর দিয়ে চলে গিয়েছিল। এপিঠ-ওপিঠ। বোকা ডাক্তার খামোখা কেটেকুটে গুলিটা খুঁজে খুঁজে হয়রান হয়েছে। জমট রক্তের মধ্যে ফুটো নজরেই পড়েনি প্রথমে।

**নেতা** : তুমিও এই দলে এসে জুটেছ নাকি ?

**মূর্তি (২)** : গুলি দিয়ে গাঁথে দিয়েছেন। ইচ্ছে করলেও আল্গা হতে পারব না।

**নেতা** : ভুমি আমাকে চেন ?

**মূর্তি (২)** : চশমাটা আর খুঁজে পাইনি। অন্ধকারে আপনাকে চেনা যাচ্ছে না। তবে আপনার গলা চিনি।

**নেতা** : আমার কথা শুনেন ? এইমাত্র যা বলছিলাম ?

**মূর্তি (২)** : আপনি মিথ্যেবাদী। কথা দিয়ে আপনি কথা রাখেন না। আপনি অনেক ওয়াদা করে সেবার আমাদের দেড় মাস লম্বা ধর্মঘট ভেঙে দিয়েছেন। আমার ছোট ছেলেটা তখন মারা যায়। আপনার কথা শুনেনি। আপনার কথা ভুলিনি। আপনি মিথ্যেবাদী।

**মূর্তি** : আমরা কবরে যাব না।

**মূর্তি (২)** : আমরা বাঁচব। (বিড়বিড় করিতে করিতে পশ্চাতে গিয়া উপুড় হইয়া বসিবে। আর দেখা যাইবে না।)  
(নেতা মাথা নিচু করিয়া সরিয়া আসে। হাফিজ অগ্রসর হইয়া কানের কাছে বেশ জোরে ফিস্ফিস্ করিয়া)

**হাফিজ** : হবে না। এ লাইনে ঠিক কাজ হবে না স্যার। অন্য রাস্তা ধরতে হবে। আমার মাথায় একটা প্লান এসেছে। দেখবেন ঠিক কাবু করে ফেলব। একটু ভোল বদলাতে হবে। সবই আমাদের করতে হয় স্যার। আপনি চুপ করে বসে দেখুন। (হাফিজ চাদরটা খুলিয়া এক প্যাঁচ গায়ের উপর জড়াইয়া বাকি অংশ ঘোমটার মতো মাথার উপর তুলিয়া দিল।)

**নেতা** : ঢং ছাড়। মেয়েলোকের মতো ঘোমটা দিয়েছ কেন ?

- হাফিজ :** (ফিস্‌ফিস্‌ করিয়া) চুপ ! আমি এখন সত্ৰীলোক । ঐ ছোকরার মা । কথা বলবেন না । দেখে যান । বুঝতে পারছেন না, সবাই একটু ঘোরের মধ্যে আছে, কিছু ধরতে পারবে না ।
- (আঁচল টানিয়া, ঘোমটা উঠাইয়া সামনে আসিয়া দাঁড়ায় । কণ্ঠস্বরকে অনাবশ্যকভাবে সত্ৰীলোকের মতো করিয়া তুলিবার চেষ্টা নাই । তবে যথোপযুক্ত আবেগে ভরপুর ।)
- খোকা ! খোকা !
- মূর্তি :** (চঞ্চল । বেদনাহত ।) কে ! কে ডাকে ?
- হাফিজ :** খোকা কোথায় গেলি তুই ? খো-কা !
- মূর্তি :** কে ? মা ? মা, তুমি কোথায় মা ? (শূন্যে হাতড়ায়)
- হাফিজ :** এই যে যাদু, আমি এইখানে ।
- মূর্তি :** তুমি আমার ওপর খুব রাগ করেছ, না মা ? তুমি বারণ করলে, তবু আমি শুনলাম না । রাস্তা থেকে ওরা ডাকল । আমি ছুটে বেরিয়ে গেলাম । তোমার কাছে বলতে গেলে পাছে তুমি বাধা দাও-সেই জন্যে তোমাকে কিছু না বলেই চুপে চুপে চলে গেছি । আজ যে ওরকম গোলমাল হবে তুমি আগে থেকে কী করে জানলে, মা ?
- হাফিজ :** মা হলে সব জানতে হয় । মা হলে জানতি, মার কষ্ট কী । মার বুক খালি হলে, মার কেমন লাগে, তুই দস্যু ছেলে বুঝবি না ।
- মূর্তি :** তোমার সব কষ্ট বুঝি মা । নাক-মুখ বেয়ে আমার কেবল রক্ত গড়িয়ে পড়ছিল । সমস্ত দুনিয়াটা ঝাপসা হয়ে গেল । আমার তখন খালি কী মনে হচ্ছিল জান মা ? মনে হচ্ছিল তুমি বুঝি আমাকে জড়িয়ে ধরে কাঁদছ । সেই সেবার টাইফয়েড জ্বরের ঘোরে যখন খালি প্রলাপ বকতাম, তখন যেমন আমায় জড়িয়ে ধরে কাঁদতে-ঠিক তেমনি । আর আমার নাক-মুখ গড়িয়ে তোমার চোখের গরম নোনা পানি কেবল ঝরছে- ঝরছে ।
- হাফিজ :** তবু তো কোনো কথা শুনিস না । তোরা কেবল মা'র দুঃখ বাড়াতেই জন্মেছিস । এ তোদের কী নতুন নেশা ! এত মরণ-পাগল কেন তোরা ?
- মূর্তি :** মিছে কথা মা! আমরা কেউ মরতে চাইনি, মা । তোমার কাছে থাকতে কি আমার ইচ্ছে করে না ? হারিকেনের লণ্ঠন জ্বলে অনেক রাত পর্যন্ত পড়ব । তেল কমে এলে সলতে উস্কে দিয়ে পড়ব, আর তুমি বারবার এসে বকবে-কেবল বকবে । তারপর লণ্ঠন জ্বার করে কেড়ে নিয়ে যাবে । টেনে বিছানায় শুইয়ে দেবে । অশ্বকারে মশারির ফাঁক দিয়ে ছায়ামূর্তির মতো ঘুমে জড়ানো তোমার ছোট্ট এলোমেলো শরীর দেখব-দেখব মা, চলে যেও না-মা, তোমায় আমি দেখব-তোমায় আমি আদর করব মা । তুমি কোথায় মা ? মা !
- হাফিজ :** ঘুমের ঘোরে কী বকছিস । স্বপ্ন দেখছিলি বুঝি ? অনেক রাত হয়েছে, লক্ষ্মী বাবা, আর রাত জেগে পড়ে কাজ নেই । বিছানা করে রেখেছি । যাদু আমার, শূতে যা ।
- মূর্তি :** আমাকে শূতে যেতে বলছ মা ? না, না । আমি শোব না । আমি এখন শোব না, মা । আমি আর কোনোদিন শোব না । একবার ঘুমিয়ে পড়লে ওরা আমাকে আর জাগতে দেবে না । তুমি বুঝতে পারছ না মা-না, না, আমি শোব না । আমি যাব না । আমি থাকব । আমি উঠে আসব ।
- নেতা :** ইন্সপেক্টর ! তোমার এই ভুতুড়ে নাটক আর কতক্ষণ চলবে ?

- হাফিজ :** ছিঃ বাবা, জিদ কর না। লক্ষ্মীটি, শূতে যাও। মার কথা শোন।  
(দ্বিতীয় মূর্তি আচমকা চঞ্চল হইয়া উঠিয়া দাঁড়ায়)
- মূর্তি (২) :** (অস্পষ্টভাবে হাফিজের দিকে হাত বাড়াইয়া) মিন্টু, মিন্টু। মিন্টু ঘুমায়নি এখনও ?
- হাফিজ :** (সুর পাল্টাইয়া) তোমার কোলে আসার জন্যে কাঁদছে।
- মূর্তি (২) :** দাও, আমার কোলে দাও। (বাচ্চা কোলে লইবার ভঙ্গি করে) ইস ! জ্বরে যে গা পুড়ে যাচ্ছে গো !
- নেতা :** খবরদার ! ফেলে দাও। ওটাকে ফেলে দাও কোল থেকে। এই শেষ বারের মতো বলছি, এখনও ভালো চাও তো সরে পড়। চলে যাও সব।
- মূর্তি :** আমি যাব না। আমি বাঁচব, মা। বৃষ্টিতে ভেজা নরম ঘাসের ওপর দিয়ে খালি পায়ে আমি আরও হাঁটব, মা। ঠাণ্ডা রূপোর মতো পানি চিরে হাত-পা ছুঁড়ে সাঁতার কাটব, মা।
- মূর্তি (২) :** কাঁদিসনে মিন্টু। তোর বাপ কি কম চেফ্টা করেছে ? দুফ্ট মুদি কিছুতেই মাসের শেষ বলে এক রত্তি বার্লি বাকি দিল না। বেতন নেই দেড় মাস, দেবে কেন ? তুই কাঁদিসনে মিন্টু। তুই কাঁদলে তোর মাও কেবল কাঁদবে। এখন চুপ করে ঘুমিয়ে থাক। দেখবি, কাল ভোরে সব জ্বর কোথায় চলে গেছে।
- নেতা :** সকাল পর্যন্ত তোমাদের নিয়ে এখানে ঠায় দাঁড়িয়ে থাকতে হবে নাকি ? না, আমি তা পারব না। এতসব আবদার আমার সঙ্গে চলবে না। গেট আউট, ডেভিল্‌স্ ! যাও বলছি।
- হাফিজ :** উত্তেজিত হবেন না স্যার। কুল্লি ! কুউল্লি !
- মূর্তি :** তুমি একটুও ভয় পেয়ো না। কিছু ভেবো না, মা। আমি কিছুতেই মরব না। ছায়ামূর্তির মতো বার বার আসব। তুমি যদি আমার কথা ভাবতে ভাবতে ঘুমিয়ে পড়, দরজায় এসে টোকা দেব। চৌমাথার মোড়ে দাঁড়িয়ে হাতছানি দিয়ে তোমায় ইশারা করব। তোমার কোলে বাঁপিয়ে পড়ব মা।
- মূর্তি (২) :** (কোলের কল্পিত সন্তানকে) দূর বোকা। তুই স্বপ্ন দেখছিস। ভয়ের কী আছে ? তুই তো আমার কোলে। আমি থাকতে তোকে মারে এমন দৈত্য দুনিয়ায় নেই। (সামনের দিকে ইশারা করিয়া) ওগুলো কিছু না। সব সং সেজে তোকে ভয় দেখাতে চায়। তুই ঘুমো। ঘুমো।
- নেতা :** ইম্পেস্টর ! আমি এসব মানি না। আমি স-ব পুঁতে ফেলব। একটা একটা করে গুলি করে আমি সব মাটির সঙ্গে মিশিয়ে দেব। হাজার হাজার হাত মাটির নিচে সব পুঁতে ফেলব। যাতে কোনোদিন আর উঠতে না পারে। ভয় দেখাতে না পারে। গুলি, সবগুলোকে আবার গুলি কর। গার্ড ! গার্ড !  
(হস্তদণ্ড হইয়া প্রবেশ করে মূর্তী ফকির।)
- ফকির :** জী হুজুর।
- নেতা :** (লক্ষ না করিয়া) গুলি কর।
- ফকির :** গুলি ! ওহ্ ! হ্যাঁ, আছে। আমার কাছে আরও কয়েকটা আছে। এই নিন বুলেট। খুব তাজা ! টাটকা ! এখনও খুন লেগে রয়েছে। হাত পাতুন। ধবুন। (স্তম্ভিত ভয়ার্ত বিমূঢ় নেতা হাত বাড়াইয়া গ্রহণ করিবে) লোড আপনি করুন। আমি ওদেরকে ডেকে নিয়ে আসি। যাই। আমি মিছিলটা এই দিকে ডেকে নিয়ে আসি।  
(হস্তদণ্ড হইয়া ফকিরের প্রস্থান। সেই গমন পথের দিকে তাকাইয়া নেতা একবার নিজের বুক চাপিয়া ধরে। হাফিজ পিছন হইতে আগাইয়া তাহাকে ধরে।)

[নেপাথ্যে মুর্দা ফকির চিৎকার করিতেছে : তোরা কোথায় গেলি ? সব ঘুমিয়ে নাকি ? উঠে আয় । তাড়াতাড়ি উঠে আয় । সব মিছিল করে উঠে আয় । গুলি । গুলি হবে । স্মৃতি করে উঠে আয় সব । কোথায় গেলি ? সব উঠে আয় । মিছিল করে আয় এদিকে । আজ গুলি? গুলি হবে আজ । কবর খালি করে সব উঠে আয় ।]

(মঞ্চের উপরে লাল মূর্তিদয় মুর্দা ফকিরের ডাক কান পাতিয়া শুনিতেছিল । ক্রমে একটু চঞ্চল হইয়া উঠিল । তারপর ধীরে ধীরে একজনের পিছনে আরেকজন-ক্রমে আরও অনেকে-সারি দিয়া চলিয়া যাইবে এবং তাহাদের উপর প্রতিফলিত আলোর রেখাও ক্রমে বিলীন হইয়া যাইবে ।)

(হাফিজ ও নেতা লক্ষ করে নাই যে মঞ্চ খালি হইয়া গিয়াছে ।)

- নেতা : (বিবর্ণ মুখে) ইম্পেস্টর ! হার্টটা জানি কেমন করছে ! বড় ভয় পেয়ে গেছি ! একটু ধরে রেখো আমাকে । আর, আর একটু ঢেলে দিতে পারবে ?
- হাফিজ : না । আপনার এখনও হুঁশ নেই । আমার নিজেরও হয়ত নেই । ঠিক বুঝতে পারছি না । (পিছন হইতে গার্ড হঠাৎ লঠন হাতে ঢুকিয়া প্রচণ্ড শব্দে বুট ঠুকিয়া স্যালুট করে ।)
- নেতা : (চমকাইয়া) কে ! এটা কী আবার ?
- হাফিজ : (দেখিয়া) ইডিয়ট ! এটা কি তোমার প্যারেড গ্রাউন্ড নাকি ? বন্দুকের গুলির মতো স্যালুট করতে শিখেছ দেখছি । কী চাও ?
- গার্ড : গাড়িতে উঠিয়া হগলে আপনাগো লাইগা এস্তেজার করতাছে । সব কাম খতম । কারফিউ শ্যাম হইতেও আর দেরি নাই ।
- হাফিজ : (প্রথম লক্ষ করিল যে, মঞ্চ খালি । ভালো করে কয়েকবার চোখ কচলায়) গুড ! সব কাজ খতম তো ? গুড ! সব কাজ খতম স্যার । নিট জব । বিশ্वास হচ্ছে না বুঝি স্যার ? ভালো করে দেখুন না নিজেই ।
- নেতা : (ধীরে ধীরে চোখ ঘুরাইয়া দেখে, তারপর সামনের দিকে অর্থহীন বিষণ্ণ দৃষ্টি মেলিয়া চুপ করিয়া থাকে) হুম্ !
- গার্ড : কিছু তালাশ করতাছেন হুজুর ? খুঁজা দেখুম ?
- নেতা : না, চলো ।
- হাফিজ : কিছু না স্যার । এসব কিছু না । গোরস্থানে এরকম কত কিছু হয় । তার ওপর আবার স্যার- মানে?
- নেতা : হুম্ । চলো । আর দেখো, মুর্দা ফকিরটাকে সঙ্গে নিতে হবে । কিছুদিন থাকুক । (বুকে হাত চাপিয়া ধরে ।)
- হাফিজ : এ্যা ? মুর্দা ফকির ? ওহ্ ! নিশ্চয়ই, নিশ্চয়ই ! ইয়েস্ স্যার । (সকলে ধীরে ধীরে চলিয়া যাইবে । গার্ড গ্লাস, বোতল ইত্যাদি গুছাইয়া লইবে ।)